

# Usah persoal dasar kerajaan

BUTTERWORTH, Ahad — Perdana Menteri Datuk Seri Dr Mahathir Mohamad hari ini mengingatkan pegawai kerajaan bahawa mereka tidak berhak menyoal dasar-dasar yang dicadangkan oleh kerajaan yang dipilih oleh rakyat.

Katanya, pegawai kerajaan dan anggota parti politik mesti memahami garis pemisah dan hak bidang kuasa antara tugas mereka dalam usaha mentadbir negara.

"Pegawai kerajaan tidak patut menyoal keputusan dan dasar-dasar kerajaan sama ada ia baik atau tidak kerana rakyat yang akan menentukan prestasi pentadbiran kerajaan setiap lima tahun sekali ketika pilihanraya umum," katanya.

Berucap di majlis perjumpaan dengan pegawai kerajaan dan pemimpin masyarakat di Sekolah Menengah Datuk Onn di sini, hari ini, Perdana Menteri berkata, kadanakala ada pegawai kerajaan, yang mempunyai pendirian politik berlainan, cuba 'mensabotaj' usaha pembangunan.

Tindakan seperti itu akan hanya

menjejaskan kelicinan sistem pentadbiran kerajaan dan kesannya akan dialami oleh masyarakat, katanya.

Perdana Menteri berkata, kemajuan yang dicapai oleh negara sejak merdeka adalah hasil persefahaman yang baik mengenai bidang kuasa dan tugas antara pegawai kerajaan yang mentadbir negara dan ahli politik yang memutuskan dasar-dasar.

Lebih 500 pegawai kerajaan dan pemimpin masyarakat menghadiri majlis itu. Turut hadir ialah Menteri Pendidikan, Encik Anwar Ibrahim; Timbalan Menteri Kesihatan, Senator Mohamed Farid Ariffin dan Setiausaha Kerajaan Negeri, Datuk Kamaruzaman Shariff.

Perdana Menteri juga melahirkan rasa kesal terhadap tindakan segolongan orang di sebuah negeri yang mengancam, mengugut dan menyoal pegawai kerajaan yang ingin menjalankan tugas mereka.

Beliau mengingatkan pegawai kerajaan bahawa mereka tidak perlu melayan arahan golongan itu, yang tidak

mempunyai jawatan atau kaitan dengan sistem pentadbiran kerajaan.

"Pegawai yang dalam ketakutan itu, terpaksa tunduk kepada perintah orang yang tidak berjawatan berkenaan sehinggakan mereka menolak arahan Perdana Menteri sendiri," kata Datuk Seri Dr Mahathir dan menambah bahawa kebebasan pegawai berkenaan untuk mendengar hujah kerajaan dinafikan.

"Jika sekumpulan orang ini sudah dipilih masyarakat... lainlah cerita..., tetapi mereka belum dipilih sudah tunjuk sikap kuku besi," katanya.

Beliau berkata, semua pihak yang terbabit dengan pentadbiran kerajaan harus menghargai garis pemisah antara ahli politik dan pegawai pentadbir supaya tidak berlaku kekacauan dalam jentera pentadbiran negara.

Datuk Seri Dr Mahathir menegaskan perlunya rakyat memberi mandat yang kuat kepada Barisan Nasional (BN) bagi menerajui kerajaan kerana tindakan itu akan menyumbang ke arah usaha mentadbir negara dengan lebih baik.